

四庫全書

史部

欽定四庫全書

江南通志卷三十六

輿地志

古蹟

七

潁州一府滁和廣六泗五州

潁州府

任城在府治北三里陳將任忠伐齊於潁水北岸
築城以圍汝陰故名俗呼蠻樓寨

平輿故城在府治南一百里北枕谷河土城尚完

俗呼為遠城按平輿在今河南汝陽縣界此蓋梁
魏時僑置諸郡縣遺址

清丘城在府治東五十六里潁河北岸隋置縣

永安故城在府治西南一百四十里汝水北岸唐
武德四年置

東城西城俱在府治西北七十里五樟林兩城相
去三十里相傳唐置府兵築城屯守於此

唐屯城在府治西南一百七十里龍項灣東相傳

唐仁瞻築

慎縣城在潁上縣西北四十里江口鎮左傳云吳人伐慎白公敗之即此漢置慎縣劉宋改置於淮南合肥此城遂廢

潁上故城在今潁上縣南即古鄭城也水經註云潁水東南流經蜩螭郭東俗謂之鄭城舊唐志云潁上縣隋置治古鄭城

武陰城在潁上縣東南正陽鎮俗謂之張飛城與

劉關二城相對

荆亭城寰宇記云荆亭城在潁上縣西南六十里
劉宋汝陰太守楊文長破魏兵於荆亭即此水經
註云潁水經荆亭北而入於淮

甘城在潁上縣西北通典云故甘城梁置下蔡郡
有關吳魏以來關防津濟之所

段家城在潁上縣西北六十里段靈君築又有洪
城在縣東三十里

蓼城在霍丘縣東三十里虞夏之際以封臯陶春秋時蓼國地唐武德四年於霍丘置蓼州

紂王城在霍丘縣南二十里

箕子城在霍丘縣開順鎮

陽泉故城在霍丘縣西五十五里漢置縣寰宇記云梁普通七年於古城內立縣大通三年改為臨水縣即古陽泉地

梅城故城在亳州西南四十里古梅伯國隋開皇

間分小黃置梅城今為梅城集

武平城在亳州西南漢縣

下邑故城在亳州東北五十里後魏僑置

藥城故城在亳州東南唐武德三年於魯邱堡置

文州並藥城縣

新陽故城在太和縣西北六十里秦置縣陳勝傳

曰呂臣起新陽是也應劭曰在新水之陽也舊志

有信陽城即故新陽之訛

樂昌城在太和縣東近細陽漢高后八年封張敖
前姬子壽為樂昌侯後漢張酺傳云食細陽之池
陽鄉即此

細陽故城在太和縣東茨河西岸漢置縣光武封
岑彭子遵為侯邑

新鄭故城在太和縣北七十里古鄭邱地漢置新
鄭縣章帝建初四年徙封殷後於此曰宋公國俗
訛為宋王城

扶陽故城元和志云在故城父縣東北三十二里
漢衛賢封邑按漢表扶陽國在蕭縣此城名偶同
耳非故國也

高鄉郭在太和縣南七里寰宇記云魏高貴鄉公
所築

潁陽故城在太和縣東北三里隋志云汝陰郡有
潁陽縣

萬壽故城在太和縣東北四十里本漢細陽縣隋

唐汝陰縣之地也宋開寶六年分汝陰北五鄉以百尺鎮置萬壽縣今為元墻集

瑕城在蒙城縣東北水經註云渦水經瑕城南即楚瑕邑

漆園城在蒙城縣東北三里相傳莊周為吏於此按莊子漆園為歸德之蒙然宋王安石題蒙清燕堂云民有莊周後世風姑存以備考

山桑城在蒙城縣北漢置縣後漢封王常為侯國

水經註云北肥水東南流經山桑邑南俗謂之北平城昔文欽封山桑侯疑食邑於此又東經山桑縣故城南俗謂之都亭城蓋山桑有二城也

舊蒙城在今蒙城縣北東晉僑置懷宇記云有南北二蒙城並在縣北八十里相去四十步皆後魏太和十年築

檀公城在蒙城縣三十七里即山桑縣城宋檀道濟為征北將軍居此因名路史謂為北蒙是也

財丘廢郡在府治西南一百十里梁武置今府治西南有小土城二東西相去二三里俗謂之東才城西才城

鮦陽縣治在府治西二百一十里輿地志云沈子國西有鮦陽郡漢光武封陰慶為鮦陽侯在此

雩婁縣治在霍丘縣西南八十里春秋云楚人侵吳及雩婁即此漢為縣屬廬江郡

胡城廢縣在府治西北二里即春秋胡子國梁置

縣

原鹿廢縣在府治南富阪之西春秋云宋楚盟於鹿上即此杜預註云鹿上今原鹿縣是也水經註云谷上經原鹿縣故城北

富波廢縣在府治南谷水北漢置以多陂塘溉稻故曰富波亦曰富陂蓋波陂古字通用也水經註云谷水經富陂縣故城北俗謂之成閭亭

松茲廢縣在霍丘縣東十五里漢初置松茲侯國

在今宿松縣界晉初改置於此寰宇記云一名祝
茲即古鳩茲誤鳩茲在蕪湖也

義城廢縣在霍丘縣北四十里宋高祖立亦名三
固縣後廢縣立戍

譙縣舊治今亳州治春秋時陳之焦邑秦置譙縣
魏黃初二年改建五都譙其一也

城父縣舊治在亳州東南七十里春秋時陳邑左
傳云僖二十一年楚伐陳遂取焦夷昭九年楚遷

許於夷實城父蓋城父即夷地也漢置城父縣劉
宋改置浚儀魏收志云浚儀縣有城父城是也今
名城父邨

苦縣舊治在亳州城東後漢地理志云苦春秋時
曰相索隱曰地理志誤也苦縣本屬陳春秋時楚
滅陳故苦亦屬楚括地志云在亳州谷陽縣界
思善廢縣在亳州南八十里城父城南漢章和二
年分城父縣置

長垣廢縣在亳州東東晉初析譙縣地僞置

沈丘故地在府治西北一百二十里古寢丘地也

孫叔敖子辭肥饒而請寢丘即此

文地在潁上縣北二十五里俗傳孔子適楚接輿

歌鳳處

潁尾在潁上縣東左傳云楚子狩於州來次於潁

尾是也

管谷在潁上縣北二十五里管仲家此

摘星樓在霍丘縣東三十里紂王城南

魏武帝宅在亳州東建安十五年令曰欲於譙東
五十里築精舍秋夏讀書冬春射獵以自娛元和
志云魏文帝祠在譙縣東五里即太祖故宅

元張萊宅在亳州城內西街之北

流星園在亳州東天靜宮南相傳有星突流於園
老子因而誕生史記云老子楚苦厲鄉曲仁里人
也括地志云苦縣在亳州谷陽縣界有老子宅及

廟廟有九井尚存在今亳州真源縣地

陳搏店在蒙城縣南五十里有陳仙公館

繁陽亭在府治境內左傳云襄公四年楚師繁陽
杜預註云鮦陽南有繁陽亭

沈亭在府治西一百二十里秦高士沈郢建

葵亭在府城宋呂公著為潁倅作亭後圃題曰葵
亭及為守時休倅圃有葵亭集

清潁亭在府治西晏殊守潁時建亭城陰俯瞰潁

水

雙柳亭在府治北渚初晏殊守潁建閣曰清漣嘗
手植雙柳於閣前後去潁民不能忘更曰去思至
歐陽修為守時雙柳成陰遂重建亭更名雙柳
竹間亭在府治宋蘇軾守潁時作

相讓臺在府治東二里楚莊王所築避暑之所

釣魚臺在府治東七十里潁水北岸漢末袁宏游

釣處

賀勝臺在府治西北十里潁水南岸宋州守陳規迎劉錡犒軍於此故名

張龍公釣臺在霍邱縣西北三十里

章華臺在亳州東南乾谿側即楚王所起也元和志云臺在城父縣南九里按章華臺在荊州詳見
辨訛

東西二臺在亳州東一里許曹操觀稼臺也

八角臺在亳州東南三里舊傳曹操所築大饗軍

士於此又蒙城縣城東有操演武臺

子牙釣臺在蒙城縣西南三十里呂望集

莊子臺舊址在蒙城縣城北隅因沒於水改築於

東門外

會老堂在府城西湖書院之傍宋歐陽修與趙槩
同在政府熙寧中相繼告歸一日槩來汝陰年幾
八十矣遊宴踰月而返因名其堂曰會老

六一堂在府城內歐陽修致政歸潁時所構

聚星堂在府城舊州治內歐陽修守潁州一時從遊者皆名流故以聚星名堂

大饗堂在亳州城內魏文帝南征軍次譙大饗六軍及譙父老百姓立大饗碑曹植文梁鵠鍾繇書篆時稱三絕

清燕堂即蒙城縣治後堂宋王安石有清燕堂詩青楊館在府治西一百四十五里相傳漢光武嘗討王尋駐兵於此

焦館在府治西南隅水池上宋呂公著守郡時建
以館焦千之因名

畢卓池在府治西鮦陽城內

龍池在潁上縣西南四十里淮潤鄉舊傳張公九
子蛻骨化龍處與霍邱接壤

東陳邨在府治東四十里宋嘉定十五年霍邱人
王鑑敗敵於此

關州村在潁上縣張龍公夫人石氏家此

包家寨在府治西六十五里又姜寨在府治西一百八十里俗呼為強寨

牛口埠在霍邱縣城東唐太宗追竇建德處

蘭亭序黃庭經石刻在潁上縣向於舊學基內掘井得二石刻久藏縣庫明末碎毀今潁州人劉氏重鑄

九仙曰在霍邱縣九仙山上俗傳淮南王與八公搗藥於此

谷陽在亳州西四十里

譙令谷在亳州北三十里魏武帝至譙令軍士築之有譙令碑

下城父聚在蒙城縣西北渦水之陽後漢志云山桑縣有下城父聚以近故城父縣故名

垂惠聚在蒙城縣西北後漢志云山桑縣有垂惠聚世謂之禮城

桑林在亳州湯陵西二里成湯禱雨之所

昇天檜在亳州西相傳老子乘白鹿緣此樹昇天

滁州

荻港故城在州西北魏收志云新昌郡領赤湖荻
港薄陽三縣輿地紀勝云荻港在清流縣西北二
十里即魏故縣州志謂赤湖在州西十里薄陽瑯
在州南二十里即故赤湖薄陽二縣故址

建陽故城在州東四十里漢置縣

蔣家城在州東南五十三里又龔家城在州南四

十里又塘惟城在州南三十里三城皆傍湖澤相傳南唐築瓦梁堰以禦北師水勢橫溢居民築此城以捍水云

南譙故城在全椒縣北晉太元中僞置南譙郡寰宇記云梁大同二年割北徐州之新昌南豫州之南譙豫州之北譙凡三郡立為南譙州居桑根之西今滁州西八十里全椒縣界南譙故城是也輿地紀勝云南譙城在縣北二界尹邨北譙城在縣

西北二十里新高邨皆齊梁時故址也又縣有臨
滁里或曰故郡治

豐樂城在全椒縣西七十里艾塘東村傍豐樂

阜陵城在全椒縣東十五里漢置縣屬九江郡

襄城在全椒縣東臨襄水入袁村或以為姚襄所
築

高塘故城在來安縣東北白塔鎮西魏收志云譙
州領高塘郡隋志云清流縣開皇初廢樂鉅高塘

二縣入蓋高塘即故郡也又有古城集在縣北八
十里疑即樂鉅

趙王城在來安縣東二十五里城北有澗澗北有
趙侯古塚又有丁城在縣東北白塔鎮東南四面
平遠城地高數丈廢置不可考

清流舊縣即今州治江左流寓立頓丘縣於此隋
改置清流縣以縣東清流水為名

鄆城廢縣在全椒縣西南鄆湖濱本漢沛郡屬縣

嘉平廢縣在全椒縣西南十五里蒲齊置屬南譙郡

寶林門在全椒縣寶林橋吳赤烏二年立

懷嵩樓在州治後統軍池上即贊皇樓唐李德裕刺滁州時建

御書閣在州琅邪山前宋乾德二年建太平興國中賜額藏四朝御書

醉翁亭在州南七里歐陽修建有記刻石蘇軾書

州志云明太僕卿趙鉞創為樓萬歷中太僕卿沈

思孝改為解醒閣 附宋歐陽修醉翁亭記

環滁皆山也其

西南諸峯林壑尤美望之蔚然而深秀者琅琊也
山行六七里漸聞水聲潺潺而瀉出於兩峯之間
者醺泉也峯回路轉有亭翼然臨於泉上者醉翁
亭也作亭者誰山之僧曰智僊也名之者誰太守
自謂也太守與客來飲於此飲少輒醉而年又最
高故自號曰醉翁也醉翁之意不在酒在乎山水
之間也山水之樂得之心而寓之酒也若夫日出
而林霏開雲歸而巖穴暝晦明變化者山間之朝
暮也野芳發而幽香佳木秀而繁陰風雷高潔水
落而石出者山間之四時也朝而往暮而歸四時
之景不同而樂亦無窮也至於負者歌於塗行者
休於樹前者呼後者應偃偃提携往來而不絕者

滁人遊也臨溪而漁溪深而魚肥醺泉為酒泉香而酒冽山肴野蔌雖然而前陳者太守宴也宴酣之樂非絲非竹射者中奕者勝觥籌交錯起坐而誼譁者衆賓權也蒼顏白髮頹乎其中者太守醉也已而夕陽在山人影散亂太守歸而賓客從也樹林陰翳鳴聲上下遊人去而禽鳥樂也然而禽鳥知山林之樂而不知人之樂人知從太守遊而樂而不知太守之樂其樂也醉能同其樂醒能述以文者太守也太守謂誰廬陵歐陽修也

漸入佳境亭在州醉翁亭北舊名同醉宋宣和中

郡守唐恪建嘉泰中郡守林磽易今名

豐樂亭在州城西南琅邪山宋歐陽修建自為記

蘇軾書刻石又有醒心亭在豐樂亭東亦修建曾

鞏為記又有班春亭

附

歐陽修豐樂亭記

修既治滁之明

年夏始飲滁水而甘問諸滁人得於州南百步之
近其上豐山聳然而特立下則幽谷窈然而深藏
中有清泉潄然而仰出俯仰左右顧而樂之於是
疏泉鑿石闢地以為亭而與滁人往遊其間滁於
五代下戈之際用武之地也昔太祖皇帝嘗以周
師破李景兵十五萬於清流山下生擒其將皇甫
暉姚鳳於滁東門之外遂以平滁修嘗考其山川
按其圖記升高以望清流之關欲求暉鳳就擒之
所而故老皆無在者蓋天下之平久矣自唐失其
政海內分裂豪傑並起而爭所在為敵國者何可
勝數及宋受天命聖人出而四海一嚮之憑恃險
阻刻削消磨百年之間漠然徒見山高而水清欲

問其事而遺老盡矣。今滁介於江淮之間，舟車商賈四方賓客之所不至，民生不見外事而安於畝畝衣食以樂生，送死而孰知上之功德休養生息涵煦百年之深也。修之來此，樂其地僻而事簡，又愛其俗之安閒，既得斯泉於山谷之間，乃日與滁人仰而望山，俯而聽泉，掇幽芳而蔭喬木，風霜冰雪刻露清秀，四時之景無不可愛。又幸其民樂其歲物之豐成而喜與予遊也，因為本其山川道其風俗之美，使民知所以安此豐年之樂者，幸生無事之時也。夫宣上恩德以與民共樂，刺史之事也，遂書以名其亭焉。

茶仙亭在州瑯邪山。宋紹聖中，瑯邪寺僧為州守曾鞏建取唐杜牧誰知病太守猶得作茶仙之句。

又有無心清風翠微三亭俱在琅邪山上

日觀亭望月亭俱在琅邪山上明宋濂遊琅邪山
記山中之亭幾二十所而二亭尤盛

落鴈亭在全椒縣西舊名落鴈塔

悟經臺在州琅邪山即張方平寫二生經處

琴臺在州琅邪溪旁唐刺史李幼卿建

希真堂州志謂不知其處宋曾肇十詠詩序云滁
城多草木希真堂列植尤甚

三隱室在全椒縣桑根山下曰南隱曰中隱曰北隱

東園在州城東隅宋梅執禮序云滁陽舊無郡圃
醉翁豐樂諸亭皆在關外獨李紳所紉東園南直
琅邪北通西澗適介守貳宅固一佳處又有北園
宋淳化中孟元喆建王禹偁北樓感事詩序云郡
有北樓通判史公署

張家園在州西三十里一名天子園俗傳周世宗

嘗至此因名

清流關在州西二十五里山勢峭峻宋歐陽修豐樂亭記太祖以周師破李景兵十五萬生擒其將皇甫暉姚鳳於此

陰陵在全椒縣南二十里即楚迷溝項羽失道處仙槎里在來安縣城東二十里此地最高人望之若仙槎然南唐築瓦梁堰時名此

安期洞在全椒縣椒陵山中相傳有安期生遺跡

飲馬池在州豐山絕頂漢高祖廟側舊傳高祖曾
飲馬於此

金甲池在州皇甫山下俗傳皇甫暉嘗屯兵洗甲
於此

統軍池亦曰孟家池在州治後宋淳化中孟元喆
以龍武統軍知軍事鑿池北園

放生池在全椒縣南三百步漢將灌嬰追項羽處
王母池在來安縣東門外深闊丈餘中甃以磚傍

有石刻

荒糧墩在全椒縣西南五十里舊傳伍員伐楚糧
匱以米覆土為墩若山積然

琅邪山寨在州西南十里琅邪山中宋建炎三年
郡守向子伋因山築壘聚鄉民拒巨寇李成

焦山寨在全椒縣城外宋焦光贊結寨於此

八角井在全椒縣門南數十步有石刻宋元祐四
年十月初吉全椒令元時忱命開義井於縣門外

以資民用今亦號元公井

神山石井在全椒縣城內元至正時鑿深七丈又傳為柴王井

琉璃井在來安縣治後泉極甘雖旱不涸以瓦礫投之聲若笙簧久之乃止

朱子題名碑在州梅瑞堂後壁

菱溪石在州城東五里本名荇溪避楊行密諱改作菱宋歐陽修菱溪石記菱溪之石六移去者五

其一最大難徙乃以三牛曳置幽谷附唐李漬荇

溪新亭記

上臨御明年消自洛陽今之太守詔牧
除民之三月得古溪郡之東北十里按

地圖志在黃道山之右昔始皇途經是山因以名
焉其下西永陽嶺進溪於荇溪此溪是也不濬川
導廣泉演漾潭島影溢江漢壩中流袁平壇四浪
澗朗雙派委輸襟帶一川斜界千畝無芟苗蘋萍
之雜其蘓練如也有廢亭占勝之地其狀依然也
照晴而空水相鮮澄遠而霽山瀉色趨向奇狀不
可窮竟訪郡之長老考亭之廢興皆曰三十甲子
二周星而不知其所由來矣驗圖籍亦昧其始興
之歲也秋七月前河中監察汝南公況前武寧軍
殿中隴西公拱州遷客司馬弘農公紹復咸以勝
槩為宴之須乃卜於亭是皆是謀遂占創今僉曰
惟日不越月他工具泊六旬有六日新亭就楹不

弗弗昭其儉也堯不佞佞示無僭也內不重門曠其景也外不崇墉達其望也錄是四時之氣成象不絕春木秀容夏雲奇峯秋天爽空冬日暖濃觸類有景興溪無窮雖羊公峴溪曷足以加其勝矣於戲物之廢興時也苟非其時聖人微言矧其蒙者乎時會昌二年正月八日建

秦皇試劍石在全椒縣西北百里舊高城村相傳始皇東巡經此山因以名石

和州

遏虎城在州西晉王導築以遏石虎又有却月城在州南天門山頂劉宋時王元謨所築

亞父城在州境唐劉禹錫記云城高而堅亞父所營

雍丘故城在州南本漢陳留郡屬縣也以流寓立今裕溪河泊所有雍家城或以為即雍丘之訛

石跋城在州東北三十里即石跋河南畿志云宋周虎所築舊傳張果老騎驢過此石跡宛然因名又有落驢橋在州小西門外亦云果老所經

龍亢故城在含山縣南四十里漢龍亢縣在今鳳

陽府宿州界江左流寓立此屬歷陽郡

晉王城在含山縣北晉使姚萇築城於此以禦苻堅今清溪東有土城數十丈當即晉王城其外十餘里有姚萇邨亦曰姚萇城

烏江故縣在州東北四十里秦烏江亭也漢東城縣地晉置烏江縣今為烏江鎮

歷陽故縣在州治秦九江郡地項羽封范增為侯邑漢置歷陽縣

穀孰廢縣在州西北漢梁國屬縣

鎮淮樓在州治前東阜高臺層構於製最古明太祖駐蹕和陽曾與諸將飲酒賦詩其上

清風樓在州治西南城隈峨嵋墩下明一統志云宋元祐間名連雲觀

水心亭在三老堂前唐張籍寄和州劉使君云送客時過沙口堰看花多上水心亭

犀照亭在州東南十里當利河口北岸晉溫嶠聞

水底有音樂之聲然犀照之因以名亭

項亭在州城東四十里烏江鎮東南即亭長艤船處

丹臺在州大西門外世傳老子煉丹之所

惠政堂在州治宋孝宗居青宮時大書惠政堂三字賜守臣胡昉

許由宅在州西二十里相傳許由所居

袁天綱宅在州南二十里地名南義

張籍宅在州通淮門內舊光孝寺又縣西五里曰
桃花塢又故烏江縣東一里有書堂相傳皆籍讀
書處

勤將軍宅在州西北雞籠山李白勤將軍歌序云
歷陽壯士勤將軍名思齊神力出於百夫則天太
后召見奇之授遊擊將軍賜錦袍玉帶朝野榮之
拜橫南將軍大臣慕義結十友即燕公張說館陶
公郭元振為首

彭祖石室在含山縣南八十里長真觀相傳彭祖
於此白日飛昇履跡猶存下有洞深莫測

陋室在州治後唐和州刺史劉禹錫遺址劉自為
銘

東關在含山縣南七十里濡須塢之北岸

昭關在含山縣北十里小峴山之西伍員自楚奔
吳過此

漁丘渡在州治吳越春秋云伍員過昭關至江漁

父乘舟渡之遂至吳今百福寺之東南舊名漁丘
渡

運米徑在含山縣南八十里舊名斗米徑杜伏威
將李子建穿渠入歷陽湖通運令部下人帶斗米
就役功即成

洗耳池在州城三十五里祁門站旁有池傳是巢
父洗耳處

八卦池在州界河鋪西北壽寧宮內葛仙翁遺跡

也

沸井在州小西門外土街頭關公廟內晉元帝渡江命郭璞筮之曰西南郡縣以陽名者井當沸其中興之應未幾歷陽井沸者三故曰沸井

西街井在州城科甲真才坊下相傳一童子嘗從井中出咸異之扣其從來曰我本華陽洞中人此井乃其後徑也自是遂不復見

飛錫泉在含山縣南六十里太湖寺昔無用禪師

當山腋鑿孔導泉日取不竭不取不溢師有真身
塔在焉

馬跑泉在含山縣十五里昭關外伍員奔吳過此
有馬跑遺跡

卓刀泉在含山縣西七十五里東關嶺舊傳漢壽
亭侯卓刀飲馬於此

廣德州

鄆縣舊城在州治東北漢高帝時建

諸葛城在建平縣西十里其中僅容千人旁有驢城馬城相去一里其間有井數十蓋昔人屯駐之地

浮城在建平縣西十里廣數畝其上有木莫能名斧之則血出地本窪下每夏潦水漲諸圩盡沒此獨巋然若浮因名

廣德舊縣在州治西南漢故鄣地孫吳析置

三峯樓在州治前宋李光登三峯樓有詩

鼓角樓在州治前宋錢公輔建曾鞏記

攀蘿亭在橫山宋學士梅詢建

范公亭在州舊司理廳東南宋范仲淹為司理時
建北有雙井亦范所鑿名范公井亦名義井後人
思之又有亭曰景范在州治西

春省亭在州治西五里小芝山上明州守朱麟建
以勸農

釣魚臺在州治北二十五里唐張志和垂釣處臺

下水深莫測藤蔓繞磯松篁夾岸臺基尚存

鳳凰臺在州治北門外州守鍾振築鳳皇墩結臺

其上因名

集仙臺在橫山頂宋梅詢建俗名禮斗臺

清容堂在州治西宋錢公輔築堂以居查深訓州

人子弟

劉文靖宅在州北三十里今為唐興寺

衆春園在州治西北玉溪之上宋紹興間叅軍趙

子濬建溪後有池清可鑒物築臺池上曰濯纓又有玉溪堂聚景樓圓嶠方壺翠溪三亭前人皆刻石記之明正德中州守喬岱復於溪上建濯纓橋暗橋在建平縣東北六十里護形山之麓舊傳伍員奔吳避於山中追者至此雲氣護之員及橋而天暗遂名

鍾村在州境宋建炎三年岳飛自宜興駐師鍾村軍中乏糧將士不敢擾民人至今稱之

紫塞圩在州治西北五里宋岳飛屯兵於此

神仙塘在建平縣南六十里淨覺寺前相傳許真君曾浴此岸有楓樹過年歉則枝枯年豐則茂豐歉半則六七月始葉

桐川舊驛在州西二十里

白馬墩在州北三十里舊傳劉文靖於此浴馬

寨墩在建平縣北十里春秋時伍員伐楚還吳立寨於此舊有寨門遺跡

鳴鼓墩在建平縣西南二十五里舊傳鄉民築亭墩上每東作時登亭鳴鼓踴躍田功

石鼓墩在建平縣東北六十里石峻嶒狀如魚鱗人行有聲如鼓因名

金井在州治北符門外里許明太祖汲此水以給軍士因名

丹井在州治南十里丹山之上相傳徐真人煉丹於此

八角井在高封周舊宅舊傳井有藏金鄉民常欲取之水輒沸湧隱隱聞笙歌之聲又有九曲池亦在宅內皆封周所鑿

郭母古井在建平縣西南三十里俗傳仙人以藥投井水變為醴者即此

金牛跡在建平縣東北十五里相傳昔有神人驅金牛至此為人所見人牛俱沒石上牛跡尚存

祠山三寶在州西五里一白玉磬篆書宣和舊物

也一火珠名軒轅鏡一趙孟頫手疏

六安州

六縣故城在今州北臯陶之後封此秦為六縣屬
九江郡漢元年項羽立英布為九江王都六拈地
志云六縣故城在安豐縣南一百三十二里而寰
宇記又謂六城在舒城縣東南六十里蓋譌或僞
置非故縣也

馬頭城在盛唐縣北今州有馬頭集即其處

白沙城在州北十三里寰宇記云六安二古城一曰六合一曰白沙莫知所始上有臯陶廟所謂六合城者六安之譌也又有東古城在州東南三十里西古城在州西十五里裴家灘又有新城在州東北十五里今為新城寺

廣王城在州南百里高岑突起尚存石跡今為寺霍州治在州南五十里霍山縣界梁置

邊城故郡在州西沈約宋志有邊城左郡領史水

邊城等縣大明八年省為縣魏收志云霍州有邊城郡治麻步山今州西南九里有麻埠鎮即麻步山也

岳安故郡即故霍山縣也在今霍山縣北五十里梁置

古英國在英山縣東北界蓋近英山而名史記云封畢陶之後於蓼六或作英六索隱曰英後改號曰蓼也

博鄉舊縣在州南漢竟寧元年封六安繆王子交
為博鄉侯國於此

開化舊縣在州西四十里霍山縣北宋元嘉時立
六安故縣即州治本唐盛唐地間元間改霍山縣
曰盛唐移治驕虞城即其地也宋開寶初改為六
安

潁水廢縣即故新蔡縣也在霍山縣東北梁僑置
新蔡縣隋改為潁水縣以潁水而名

弩臺在州西南四十里相傳漢武帝試弩於臺下
仙人臺在英山縣吳山之坎世傳有仙飛昇於此
礪臺在霍山縣威遠門外五里古城西笑兀中流
石狀如臺有觀瀾亭下臨大河石壁上鐫小赤壁
三字

釣魚臺在霍山縣西三十里石生水濱若臺然傳
為左慈釣魚處

梳粧臺在霍山縣南五十里東流河即仙女臺世

傳宋南遷有尼飛昇在此

螺螄店塔在霍山縣西北五十里高九丈宋元祐
年建

魯班門樓在霍山縣南四十里

焦家莊在州西二十里宋狀元焦煥故居又有萬
卷堂在霍山上舊傳煥讀書處

江立信讀書處在州龍穴山廣福寺

英布故宅在英山尖

道士冲在霍山縣西九十里道士徐隱元修真於此

石門關在英山縣東九十里

柳林關在英山縣北四十里

英山寨即今英山縣治宋羅田縣地淳祐間立鷹山寨咸淳初更名英山因立為縣尋廢德祐二年復置

第十泉在州龍穴山頂水味香甜張又新品為天

下第十泉

玉虹泉在英山縣西北三十里太平橋石壁鑿此三字並有石刻題咏

落淚洪在霍山縣西四十里有孝子昇櫬至此泣盡繼之以血

龍爪石在州城西巨石臨水上鑿龍爪二字點畫遒勁大如斗諺云龍爪見狀元出

老子鶴跡在英山縣羊角山頂石上指爪宛然唐

高祖時老子降此

凌霄樹在霍山上相傳為漢武帝手植

復覽山白在霍山縣東二十里復覽山頂宋末戍
邊設

泗州

徐城有二一在州東北八十里周時徐子國尚書
費誓云淮夷徐戎並興史記云穆王時徐有偃王
即此漢置徐縣寰宇記云大徐城一名薄薄城又

名故故城即古徐國也一在州西五十里隋開皇
初置徐城縣屬下邳郡治大徐城今有徐城廟
高平郡城在州北一百十里漢為高平侯國陳太
建六年吳明徹建高平郡於此亦名吳城今為吳
城鎮亦名城兒頭集

高冢城在州西北寰宇記云魏義興郡城也在徐
城縣西北七十里梁以為興安郡領高冢城

淮陽城在舊徐城東北一百五十里晉義熙中置

郡

角城在州東南晉義熙中置城臨泗水

朱沛故城在州西去故徐城六十里其地有朱沛水故名梁武帝置

嶢石城在州西北一百三十里梁天監時築

瀝橋城在州西北寰宇記云在徐城縣西南二十五里梁天監二年築置戍南臨瀝水橋故名

古屯城在州西寰宇記云在徐城縣西南八十五

里陳太建五年吳明徹於此置堰斷淮水以灌濠
州緣此築城

拖城在州北三十里又半城在州北九十里北朝
時置

李千城在州西北寰宇記云在徐城縣西北三十
里後魏李千于此築城置戍因名

南重岡城在州西北寰宇記云在舊徐城縣西北
九十里通濟渠南一里隋大業八年移置重岡縣

于此緣重岡山為名

臨淮故城今州治本徐城縣地唐武氏長安四年
割徐城南界兩鄉于沙塾邨置臨淮縣南臨淮水
西枕汴河

淮平故城在州西二十里宋紹興二十一年析臨
淮縣地置淮平縣

盱眙故城在今盱眙縣東北盱山之麓淮水之濱
阮勝之南兖州記云盱眙本春秋吳善道地也秦

置盱眙縣許慎曰張目為盱舉目為眙城居山上
可以眺遠故名

霸王城在盱眙縣東北三十里又有漢王城小兒
城相傳皆項王立義帝時屯兵處

富陵故城在盱眙縣東北六十里漢置

睢陵城在盱眙縣西五十里漢置睢陵縣在今睢
寧縣界劉宋泰始中沒于魏因僞置於此

淮陵城在盱眙縣西八十五里漢縣今為淮陵鄉

又縣西北六十五里有三城今為湖又淮陵之西有焦城梁天監時王燮保焦城即此

公路城在盱眙縣西北寰宇記云在故招信縣西北六十里北帶淮水漢建安中袁術所築

考城故城在盱眙縣南晉義熙中改盱眙縣置考城直瀆陽城三縣屬盱眙郡

魯縣故城魏收志云淮陰郡有魯縣北齊廢寰宇記云廢魯城在盱眙縣南三十里

九山城在盱眙縣西北胡三省通鑑注云九山店之東則陷岡湖南則馬城淮流至此謂之九山灣土人呼為獅子渡北兵渡淮之津要其東鳳凰洲在淮水中約長十里

奔精城在盱眙縣西南寰宇記云在故招信縣南六十里相傳是蠻精王所築

龜山城在盱眙縣東北三十里宋文帝築以拒魏隋置濟陰縣即此

銅城在天長縣西北四十五里相傳吳王濞築城
於此鑄錢

東陽城在天長縣西北七十五里北至東陽山秦
縣陳嬰為東陽令史即此尋置東陽郡俗謂之屈
城

石梁故城在天長縣西三十里東晉所置為戍守
處俗名古城遺址猶存又有土城在縣東北三十
里一名新城蓋齊時涇州治此

橫山故城在天長縣東南三十里梁置縣又有義城在縣南二十五里或曰梁時即於此置縣

五河故城在今五河縣澮河南岸金岡山北宋端平二年於五河口築城屯田咸淳七年始置安淮軍及五河縣以有澮潼沱崇淮五河合流而名又宋安淮軍城在縣北二里沱河北岸俗謂之故軍城遺址猶存

虹縣故城在五河縣西漢置舊說入今虹縣誤詳

見辨訛

大屯城在五河縣南七里俗名大城坪又小屯城
在縣西南六里俗名小城坪皆宋末屯軍地

邊軍城在五河縣東宋末夏貴所築今為儒學

曹公城在五河縣南二十里明曹國公李貞遊兵
淮西時所築

韓信壇在州東七里信屯兵處也

隋離宮在州北青陽鎮西十里煬帝所建俗名花

園

都梁宮在盱眙縣南十六里都梁山上隋大業元年建置離宮四十餘所此其一也宮之西有流杯殿釣魚臺四望殿其側有曲河以安龍舟大舸翠屏堂在盱眙縣玻璃門外起秀亭前宋陸游記云方國家承平時邊郡游觀有雅歌之堂萬柳之亭而翠屏之盛又非雅歌萬柳之所可及也
先春亭在州城上東北隅宋時建

玻璃泉亭在盱眙縣治東第一山下有亭覆焉為
十景之一

牛搏虎碑亭在天長縣西郊外嶽廟今亭圯碑移
於廟

掛劍臺在州北寰宇記云在大徐城北臨朱沛水
相傳為延陵季子掛劍處或入于邳州或入于徐
州皆誤也詳見辨訛

八仙臺在盱眙縣東三里有八仙坐石坐處有

石棋枰為十景之一

望夫臺在天長縣西南三里相傳有女子望夫不歸立化為石

分金店在州西三十里相傳管鮑分金處

下阿邨在天長縣東北下阿溪上接高郵州界即晉時三阿唐光宅初徐敬業拒李孝逸于下阿即此寰宇記云唐開元三十九年於下阿邨置千秋縣蓋本屬高郵時乃割屬也

朱壽昌故里在天長縣東南四十里秦蘭鎮

麋畷在天長縣界博物記云東陽縣多麋食草根其處成泥名曰麋畷居人隨此畷種稻不耕而穫樂樂堆在天長縣北十里舊傳煬帝南幸宴樂於此俗呼雁落墩音之訛也

水晶營在盱眙縣東南十里外連亘數十里相傳隋煬帝設此

鮑家寨在天長縣南五十里又顏家寨在縣西四

十里二寨傳是宋高宗南渡所築

李制使柵在五河縣東二里橫跨河口宋咸淳五年兩淮制置使李庭芝所立石基尚存

浮山堰在盱眙縣城外梁天監中築堰遏淮水以灌壽陽南起浮山北抵巉石極丁夫之力百計而成宋秦觀有梁堰賦

紅羅幃在盱眙縣西七十里明太祖生時取水浴之忽有紅羅一幅浮來即取以為襁褓後人因名

其水

聖水在盱眙縣六十里相傳漢高祖禱山得水飲
軍士於此因名

聖母井在盱眙縣東北三十里龜山寺

溝在天長縣城東舊傳韓世忠於此破敵

第一山碑在盱眙縣堂東壁宋米芾書

古鐵橋在五河縣東南二里淮河中流水涸時見
兩傍有鐵柱

江南通志卷三十六

欽定四庫全書

史部

江南通志卷三十八

詳校官給事中_臣丁雲錦

檢討_臣德生覆勘

總校官編修_臣王燕緒

校對官編修_臣勵守謙

謄錄監生_臣黃嵩齡

欽定四庫全書

江南通志卷三十七

輿地志

壇廟

祠墓附

江寧一府

江寧府

社稷壇在府治北金川門外

風雲雷雨山川壇在府治東南雙橋門內

勅建先農壇在府治聚寶門東旁置有耜田四畝九分歲

以仲春亥日行耕藉禮

郡厲壇在神策門外

縣曰邑厲

里社鄉厲二壇在各鄉

關帝廟在府治西雍正五年奉

旨追封三代公爵同日祭於後殿

城隍廟一在石城門內一在府治前

勅建八蜡神廟

劉猛將軍廟並在府城聚寶門外梅岡

以上壇廟所屬縣皆

如制

旗纛廟

各營俱如制

福吳富農龍神廟在府城錢厰橋雍正五年遵建
帝王廟在府治北欽天山明洪武中勅建祀歷代
帝王今圯

三聖廟在府治西北祀史皇倉頡又倉聖廟在雨
花臺

化龍王廟在府治南雨花山後

禹王廟在府城保寧坊

武成王廟在御街西祀太公望

吳大帝廟在清涼寺西即當時舊宮

晉元帝廟在治城西唐天祐間建

忠烈廟在雞鳴山祀漢秣陵尉蔣子文明洪武間建

軍師廟在鎮淮橋祀諸葛亮

周江東廟在攝山相傳吳時賢令

卞忠烈廟在冶城西祀晉卞壺及二子眈眈

梅將軍廟在雨花臺晉梅賾嘗屯兵於此因立廟
謝將軍廟在鳳凰臺祀晉謝玄宋乾道間建

侯將軍廟祀陳侯瑱瑱與王琳戰烈山下大捷土
人盛稱瑱功烈遂名山曰烈因立廟

武烈帝廟在冶城西祀隋陳仁杲南唐時越人寇
常州柴克宏帥師往救夢仁杲遣兵助戰果大勝
奏請封祀

劉忠肅廟在雞鳴山祀南唐清淮軍節度使劉仁
贍周師歷境仁贍鎮壽州力戰固守援絕其子欲
降仁贍立斬之以疾卒周世宗嘉之追賜爵彭城
郡王唐亦贈太師謚忠肅明洪武間建

雙忠廟在府治江東門外祀唐張巡許遠

李王廟在府城東南祀南唐李知誥

曹武惠廟在雞鳴山祀宋曹彬明洪武間建

旌忠廟在鐵索寺之東南祀宋死節統制姚興

東平忠靖王廟在江寧鎮祀張有嚴元至正中建
徐將軍廟在獅子山明洪武初建將軍烏程人晉
時行賈江淮間道廬之巢湖溺死為神巢民奉之
甚謹明太祖渡江諸將多祀神舟中所向克捷或
以事聞命南安侯俞某立廟祀焉

忠烈廟在府城竹街祀宋節度使牛富富為統制
守樊城六年不拔元兵陷城赴火死賜諡忠烈立
廟建康

衛國忠肅公廟在雞鳴山祀元福壽至正丙申明
兵下集慶路福壽死之詔立廟城南土岡明洪武
中建於此

曹南王廟在柴市街祀元阿喇哈至元元年建
明功臣廟在雞鳴山祀徐達常遇春李文忠鄧愈
湯和沐英配享馮國用耿再成丁德興張德勝吳
貞康茂才茅成胡大海趙德勝俞通海華高吳良
曹良臣吳復孫興祖等

國朝素于令廟考

太祖實錄洪武二年正月乙巳立功臣廟於雞籠山六月丙寅功臣廟成

論次諸臣之功以徐達為首次常遇春又次李文忠鄧愈湯和沐英馮國用胡大海趙德勝耿再成華高丁德興俞通海張德勝吳良吳貞曹良臣康茂才吳復茅成孫興祖凡二十有一人命死者塑像祀之仍虛生者之位初胡大海等沒上命塑其像於卞壺蔣子文之廟至是復塑像於新廟是祀也掌在太常記在會典二百餘年已來未之有改也太倉王世貞獨考其誤以為國初之封六王韓魏鄭曹宋衛也立廟之時韓宋猶未受封何以知其不全終而絀之黔寧是時官不過指揮何以知其必樹大勲而驟登之此記事者之誤也然則云何曰塑像虛位誠有之其後如韓宋者則弗克與享也今之位次据永樂初年見在者而書之也王氏之考覈矣而未及詳也夫豈惟黔寧哉初封

二十八侯何以獨舉五人繼封十二侯何以獨舉一人自韜國以外皆以有功待封者也若黔國則與黔寧比肩者也如國史之云其所謂論次者以何為援据乎國史於二年既云論次諸臣之功定祀二十一人矣七年六月書祔祭新戰沒定遼衛指揮高茂等三十八人八年正月又書增祀華雲龍李思齊等一百八十八人九年又書祔祭何文輝及有功者一百八十八人十三年又書祔祭顧時以下二百八十人以二年之定祀者為是則七年以後不宜增以七年以後之增祀者為是則二年之祀未嘗定同是祀典同是國史而前後舛錯如此此所謂以予之矛陷子之盾者也虛位塑像王氏以為誠有之吾以為非也二年正月上勅中書省臣曰諸將相從捐軀戮力開拓疆宇有共事而不覩其成建功而未食其報追思功勞痛切朕懷其命有司立功臣廟於雞籠山序其封爵為像以祀之凡

年七月又諭禮官曰諸將始從征伐宣力効勞朕
於爵賞不敢吝惜大者公小者侯死則俾之廟食
以報其功由二年之勅觀之則云塑死者之像由
九年之諭觀之則云報死者之功其詞意甚明也
今果有生者虛位之事則立廟之日寧不以此明
諭省臣而獨諄復於死者耶羅鶴記云雞鳴山廟
祀定於洪武十一年斯又與二年何異一統志南
京功臣廟建於洪武二十年嘉靖中科臣禮官駁
郭威襄配享之議皆援以為証且謂黔寧東甌此
時尚在以實生者虛位之說雖然宋潁涼三公與
長興武定二侯皆無恙也如宋潁涼三公者將先
虛位而後絀之耶長興武定或先虛位而後不及
補耶王景撰黔寧神道碑云王薨之明年塑像功
臣廟勅太常祀以太牢今二十年位次已定則黔
寧之塑像何以待其薨之明年耶傳曰豫凶事非
禮也記曰之生而致死之不仁而不可為也以皇

祖之神聖觀會通以行典禮而繆戾若此耶故生者虛位之說吾斷以為無之

忠節廟在府城東三里祀宋王珙珙從張浚軍歿於陣

褒忠廟在南門外報恩寺祀宋死節通判楊邦乂宋建伍相廟在上元縣長寧鄉即子胥解劍渡江處董將軍廟在上元縣治祀宋董成成隨曹彬下江南民德之

禹王廟在句容縣秋干村又一在赤山湖

劉明府廟在句容縣東門內祀晉邑令劉超

梁文孝廟在句容東門內蕭統嘗讀書茅山邑人祀之

李衛公廟在句容縣治東南祀唐李靖武德四年靖討平輔公柝於丹陽

陳武烈廟在句容縣東門祀南唐陳仁杲

顏魯公廟在句容縣顏家村祀唐顏真卿

盧大王廟在句容縣西祀南唐盧絳

沈使君廟在句容縣仁信鄉祀宋沈慶之

廣濟廟在句容縣茅山相傳陶弘景翬龍於此禱雨輒應
左伯桃羊角哀廟在溧水縣南七十五里

至聖孔子廟在高淳縣東三十里漆橋祀孔子五代
王孔子伯魚子思續文獻通考孔子五十四世孫
文昇修其自序世家略曰文昇之十二世祖檜唐
同光中避亂自闕里來居浙江溫之平陽又傳至
十一世潼孫宋德祐末職教建康既又娶於溧陽

攜諸孤就外氏以居闕里志潼孫生四子文昇文
昇文得文昱文昱又自漂陽徙居高淳康熙六年
山東衍聖公委員來高淳之漆橋建造廟宇設立
奉祀春秋祭享

項王廟在烏江去江浦縣治西六十里

龍王廟在六合縣山上廟有井相傳雲氣出則立
雨

名宦祠在學宮內

鄉賢祠在學宮內

忠義祠在縣學宮內

節孝祠在府治三山門

以上四祠所屬縣俱如制

先賢祠舊在青溪東宋制使馬光祖建祀吳泰伯
范蠡嚴光諸葛亮張昭周瑜是儀王祥周處王導
陶侃卞壺謝安謝玄王羲之吳隱之雷次宗劉琨
陶弘景蕭統顏真卿李白孟郊李建勲潘祐曹彬
張詠李及包拯范純仁程顥鄭俠楊時李光張浚

楊邦乂虞允文朱熹張拭吳柔勝真德秀凡四十一人皆生長金陵與宦遊於此者後祠毀明焦竑言於大學士葉向高李廷機乃屬祠祭郎葛寅亮於普德寺後山建祠增蘇軾一人春秋祀之

廣惠祠在雞鳴山宋訥記略云按記龍陽人張渤發迹於吳興宅靈於廣德西漢以來蓋已有之或謂即張湯之子安世而顏真卿所記則在於新室建武之間以時考之不無牴牾至於錫封加號則

始於唐之天寶繼於宋之咸淳旱澇疵癘禱之必應

汪越國公祠在府治祀隋汪華唐封越國公立廟
賜額

范忠宣祠在舊轉運司西廳祀宋范純仁嘉定八
年真德秀建

一拂清忠祠在清涼山麓祀宋鄭俠

附

明葉向高

重修鄭一拂祠記

一拂先生者宋熙寧中上流民
圖鄭公俠也罷官歸只餘一拂

故稱一拂先生先生吾邑人其祠於此者以嘗從其父監稅江寧讀書清涼寺後人即其地祠焉嘉定中易先生名為介今祠名仍稱一拂者以此邦人習焉不欲改也祠久圯廢金陵太史焦公重新之余謂先生聲名在天壤忠義在簡編魂魄在名山俎豆在郡國既已千秋無斁矣然讀先生傳及謚議而不能不歎世之人淺窺乎先生也彼以流民一圖為先生重耳而不知先生力拒權相之招至昭以美官而不顧屢觸羣姦之怒至中於危禍而不辭汲汲皇皇為萬姓請命此其人豈僅以敢言慷慨自表見者銀臺之疏一上能令主人主感歎咨嗟徬徨不寐舉平日君臣間講求振古之事業一旦而幾於盡格雖當時元老大臣如富韓諸公力爭而不得而先生以監門小吏乃能得之其精誠力量為何如乎先生一爭於安石而勝再爭於惠卿輩而不勝新法之行而罷罷而復行先生之

竄而歸歸而復竄以卒成元豐紹聖之禍焉此天也非先生之所能為也吾讀先生前後疏皆忠憤激烈至於用兵之利害羣小之姦邪反覆開陳無所顧忌千載而下猶足寒心宜其感人主之心而動其聽使世之臣人者皆如先生天下豈有不可為之事哉先生之志雖不售而精忠勁節已足暴於天下萬世無所復憾獨惜元祐彙征之時僅以廣文一秩置先生於遠郡而無能推轂同升以究議先生之用則司馬諸賢亦有不能辭其責者後之也介然特立於衆君子之中不可及也斯其為知先生矣夫金陵自六代來寄跡者不知其幾皆湮沒無聞而先生讀書一片地經今五六百年草木猶香廟祀勿絕回視半山之亭不啻霄壤然則監門小吏其所得固已多矣

張南軒祠在天禧寺祀宋張栻淳熙間杜杲建

附

杜杲重修張南軒祠記

人之生有此心則有此知
堯舜之聖此心此知也夫

婦之愚無以異於堯舜以天而不以人則明以人
而不以天則昏夫尊賢而賤不肖好善而惡惡此
人之本心與生俱生天地之自然也比小人嫚君
子趨惡而違善此習之而不知人欲之使然也何
以言之匹夫信義行於里閭蓋有盜賊斂干戈而
過其間者烈婦毅然而不可奪世俗固有立祠宇
以奉之者是孰使之天實為之人心之良知也降
周訖孔至孟氏而道統不傳天理幾泯人心日晦
由漢而下上下下之間莫有任此責者至於我宋尊
道重德已見於削平肇造之初其後濂溪二程先
生出而發聖賢之秘孟氏始得其傳道統於是乎
有宗高宗以來文公朱先生以身任道開明人心

南軒先生張氏文公所敬二先生相與發明以續
周程之學於是道學之盛如日之升如江漢之沛
婦人孺子聞先生之名皆知其賢譬之景星麟鳳
不以為瑞者妄人也凡講習之地皆有祠宇崇尚
嚴潔足以啟人之敬仰百年之間儒風彬彬豈無
自然而然獨金陵天禧寺之側有屋六七楹曰南軒
實先生講習之地想其朝思夕維參前倚衡天地
之運化聖賢之傳授講求乎尊君救世之策發揮
乎垂世立教之序闢百聖而不違通萬世而無媿
是軒也豈容使之荒蕪而不治惜乎歲久希重道
之士日就傾圯甚而春時為遊宴之所杲作贅江
淮幕猶局閉空閒未至若今之狼籍心竊念之告
之邑長而莫我聽近冒閭事欲因舊而增新之比
至殆不可舉目於是命工治葺內外整齊繪先生
之像於中使承學之士載瞻祠宇人亡道在如將
見之興起良知有躍然不自己者嗚呼問有當式

者墓有當拜者此軒之當新庸非守邦者之責尚
冀來者之不忘也繫之辭曰孟氏日遠吾道日昏
道之明昏儒之疵醇學焉而疵韓董楊荀自時厥
後疵亦靡聞我宋立極曰義與仁教風德雨太和
蒸薰篤生鉅儒濂溪二程文公宣公道鳴中興伊
昔宣公講學斯軒南軒之名與道俱尊奚未百年
棟宇摧頽令我來斯瞻載頌亟命匠氏斬然一新
有隆斯堂鏘鏘其門像圖惟肖莫位安神遂使
先師不窘寒溫牢醴時薦觴豆序陳豈
軒之新軒存敬存礪石琢詞以告後人

二賢祠在鳳凰臺旁

國朝雍正初知縣黃光夏始建專祀唐李白後於臺址
掘得斷碑有晉賢阮步兵墓六字因合祀阮籍於

此

程明道先生祠在上元縣治東明景泰初重建

附

宋朱熹記

資政殿大學士建安劉公珙居守建康之明年夏四月始立明道先生之祠於

學而以書走新安之婺源抵熹曰吾少讀程氏書則已知先生之道學德行實繼孔孟不傳之統願學者雖不能至而心鄉往之及來此邦屬邑有上元者先生少日宦遊處也考之書記均田塞隄及民之政為多脯龍折竿教民之意亦備然問之故老以稽其實則兵革變故之餘風聲氣俗蓋已無復有傳者矣始至慨然即欲奉祠以致吾敬使此邦之為士者有以興於其學為吏者有以法於其治為民者有以不忘於其德不幸歲適大疫救饑之事方急於今乃克遂其志以吾子之嘗誦其詩

而讀其書也故願請文以記之既而府學教授孫君萬沈君宗說亦以書來申致公意且具道公始之所以焦勞而未及與今之所以暇豫而得為者其語詳焉熹發書喟然仰而歎曰尊賢尚德公之志則美矣既富而教公之政則得矣屬筆於我公之意則勤矣雖然先生之學自其大者而言之則其所謂考諸前聖而不謬百世以俟後聖而不惑者蓋不待言而喻自其小者而言之則上元之政於先生之遠者大者又懼其未足以稱揚也吾何言哉於是伏而思之先生之學固高且遠矣然其教人之法循循有序而嘗病世之學者舍近求遠處下窺高所以輕自大而卒無得焉則世之徒悅其大者有所不察也上元之政誠若狹而近矣然其言有曰一命之士苟存心於愛物於人必有所濟則其中之所存者又烏得以大小而議之哉區區不敏竊願以是承公之命庶幾於公之志先生

之學兩有補焉又惟公之忠言大慮既已効於朝廷今雖在外而其所以救災而弭患者又如此其汲汲也則於先生之所存必有深感而默契於中者矣其祠之也豈獨以致其尊賢尚德之意使民不忘而已哉若夫推公之志而以先生之所以教者教其人使之從事於為己愛人之實而無空言躐等之弊是則孫沈二君之任也與二君勉旃熹於是其有望焉爾矣淳熙三年夏四月丙申新安朱熹

真德秀記

先生之生鍾乎元氣之會學之所至純乎天理故其生色也盎然若

春陽之溫其吐詞也泛然若醴酒之醇同設教於家而士之願從者衆同爭新法於朝而天子亮其忠用事者感其忱一時忤意者皆貶而先生獨畀憲節力辭不就去之而猶見思及其歿也士大夫知與不知皆為流涕以為時使見用必將有綏來動和之效非先生之心學純乎天理其孰能與於

斯乎先生之仕也嘗主江寧之上元簿考其設施
若均田賦興本計息邪說正人心等事皆天理之
流行著見者也乾道中資政殿大學士劉公拱知
府事始祠先生於學宮而侍講文公先生實為之
記嘉定甲戌危君和嗣居其職乃請增而大之德
考時將漕焉捐金三十萬粟二千斛以助之未幾
豫章李公珏繼至咸相其役為堂三間中嚴像設
而扁之曰春風其上為樓高明潔清內為齋二東
曰主敬西曰行恕後為小室焉曰讀易外為齋一
曰近思齋之側為亭曰靜觀又為兩廡翼之而刻
河南雅言於其壁危君之於斯役可謂勤矣而又
請為之記再三返而不置德秀以固陋力辭而不
可得也顧自惟念少知誦習先生之書而粗若有
見者竊謂自有載籍而天理之云僅見於樂記先
生首發揮之其說益明學者得以用其力焉所以
開千古之祕覺萬世之迷其有功於斯道盛矣而

其所以進於此則又有二言焉母不敬以操存於未發之先思無邪以戒謹於將發之際涵養省察動靜交飭知天事人二者兼盡及其至也中一外融顯微無間則雖人也而實浩浩其天矣若是者其於先生之道有合乎否也過不自料次第其說以授之危君幸以為然則刻之堂上以示遊於斯者使知先生之道雖高而用力明吳節記

宋明道程先生

嘉祐中為江寧上元簿郡志載其惠政著聞者數事宋初上元田稅不均近府膏腴地多為豪家厚僧薄其稅買之小民苟一時之利久則不勝其弊先生為令畫法民不擾而一邑大均會令罷去先生攝典劇邑訟牒日不下二百處之有方不閱月民訟遂簡江圩稻田賴陂塘以溉盛夏塘堤大決非千夫計不可塞法當言之府府言於漕司然後計功調役非月餘不能集先生曰比如此則苗稿

久矣民將何食遂發民塞之歲則大熟江寧當水
運之衝舟卒病者則留之為營以處歲不下數百
人至者輒死先生察其由蓋計留然後請於府給
券乃得食比有司支其餼已數日矣先生乃白漕
司給米貯營中至者即與之食自是生全者大半
仁宗登遐遺制官吏成服三日而除及釋服之朝
先生進於府尹曰三日除服遵遺詔也若朝而除
之止二日爾尹怒先生曰公自除之顯非至夜不
敢釋也一府相視無敢除者茅山有龍池產龍如
蜥蜴祥符中中使取二龍至途中奏云一龍飛空
而去鄉人嚴奉以為神物先生今捕而脯之使人
不驚至邑之初見人持竿竹以粘飛鳥者因取其
竿折之教之使勿為及罷官艤舟郊外有數人共
語曰自主簿折竿鄉民之子弟不敢畜禽鳥此蓋
善政存心之槩傳頌於人而不忘者及考宋史止
載茅山脯龍事乃知當時國史採錄或有未備不

若邑民思念深切故錄之為加詳也然先生之賢
豈待史傳而後傳哉剛健中正存乎中純白光輝
著於外事君以至誠仁愛為本持己以主敬行恕
為要其教人則由灑掃應對以致於窮理盡性其
著述則表章學庸傳註周易以開性理之原其道
學之傳孟子之後一人而已豈待史傳而後傳哉
上元舊有先生書院廢弛已久景泰初三衢姜君
德政為今於茲其治民制事一以先生為法久而
民大和會遂經治廨宇莫不煥然念先生遺愛不
可泯也乃即故址為祠以祀先生請於府尹馬公
諒府丞陳公宜與邑之僚咸以為然遂畚土於癸
酉冬迨甲戌秋季而是祠以成謂節忝與斯文宜
有紀述於是為書先生之政績與是祠創構之由
於石俾邑民歲時瞻視焉工畢落成敬奠以詩曰
相古聖賢為政以仁仁行職修無論卑尊惟程先
生以大賢之學不恤薄佐來莅上元仁漸義洽惠

及飛鳥詎曰黎民由宋元迄今三百餘載而譽望
恒新有茂宰忱慕啟迪作祠繪像用彰示乎人人
俾進禮振泉宛瞻玉石像如彼祥雲思先生之道
德邈不可及謹書賢跡勒之琬琰與宇宙而俱存
真文忠祠在壽思堂西祀宋真德秀寶祐間馬光
祖建

馬莊敏祠在城隍廟東祀宋制使馬光祖

三忠祠在聚寶門外祀宋楊邦乂文天祥明李邦

華皆吉水人

表忠祠在全節坊明萬厯三年奉詔祀建文死難

諸臣方孝孺陳迪齊秦鐵鉉暴昭侯秦景清毛泰
卓敬郭仕盧迴黃觀黃魁陳植胡子昭練子寧陳
性善茅大方黃子澄周濬司中胡潤盧原質廖昇
彭與民劉瑞王高鄒瑾王叔瑛王良婁漣周是修
龔太陳繼之韓永黃鉞戴德彝高翔鄭智曾鳳詔
王彬王度甘霖謝昇葉希賢董庸王玘魏冕巨敬
樊士信李文敏王良鄭居貞陳本立林嘉猷湯宗
姚喜葉惠仲陳彥回黃希范宋徵黃彥清劉璟程

通葛誠陳忠賢徐輝祖梅殷耿濬胡觀廖鏞陳質
耿獻俞通淵張倫王資崇剛倪諒瞿能宋忠莊德
孫泰楚智朱鑑馬宣彭聚彭二謝貴余琪劉政宋
瑄余本周拱元蔡運鄭恕顏伯瑋唐子清黃謙王
省何申余逢辰高魏鄭華梁良用盧振曹濬曾廷
瑞伍性原陳應宗呂賢林珏鄒君默牛景先儲福
一臨海樵夫一松江府同知皆失名 按正氣紀
文忠傳周繼瑜江西撫州人建文中為松江同知

北兵南侵勤王詔下繼瑜募兵入援後京師破械
至燕都不屈磔於市則所謂失名同知為周繼瑜
無疑也

方正學祠在聚寶山祀明方孝孺萬厯間建

附

明

薛應旂記

余嘗讀易至革之象曰湯武革命順乎天而應乎人未嘗不歎聖人之克相上

帝勤恤民隱至以身冒死而不顧也及觀魯論之稱夷齊也曰求仁得仁又何怨則又歎曰嗚呼仲尼之意深矣稱湯武以立生民之命仁夷齊以正君臣之義化裁達變貞固立本夫固各有攸當而不可以執一論也噫夷齊遠矣詎謂千百世之下如先生之所值者乎先生姓方氏諱孝孺字希直

遜志其別號也居緱城里人又稱為緱城先生父諱克勤從事聖賢之學先生實其仲子淵源所漸日擴而大其出處本末則者儒父老往往能言其事然亦有傳其遺事有尊鄉錄有補國史之議有春秋俎豆之請夫既或述之矣吾獨悲夫先生之所值者夷齊之時所執者夷齊之見而獨無太公為之一引援其死獨慘於夷齊也昔武王觀兵孟津諸侯不期而會者八百君子篚厥元黃小人壺漿簞食凡紹王而見休者蓋已盡乎天下之人矣孤竹二子獨為叩馬之諫至謂之不仁不孝維師尚父時為鷹揚血流漂杵前徒倒戈何有於二子哉而顧扶而去之俾弗罹於左右之兵也蓋武王義兵也二子義士也太公之扶亦各從其義也周家卜世三十歷年八百雖至叔季之微猶為天下共主而方伯之強諸侯之僭環視而不敢誰何者夫亦以名義所在等於天地明於日月威於雷霆

凜於鬼神洋洋乎鼓舞羣動整齊六合制御八荒
攝伏庶慝俾夫渙者萃雖者合強梁者沮狂詐者
息而如綵之緒猶得維持於數十年而不壞者謂
非夷齊之諫太公之扶有以為之耶然首陽之卧
采薇之歌慷慨之士至今扼腕史遷亦謂其積仁
潔行深悲不得其所而有感於天地之報施其歎
息痛憾之意蓋直浮於言外矣使其視先生之死
吾又不知其當何如以立言也然夷齊得夫子而
名益彰先生附夷齊而義益烈千百世而下猶凜
凜有生氣則先生之於夷齊均為不死者矣寧海
舊建祠於緱城里祀先生父子嘉靖丙申懷遠楊
君時季令茲邑謂緱城舊祠規制未愜無以昭示
前修興起後學遂進諸生楊天倫輩議毀卧龍山
三官祠改建請諸巡按御史張君景允其議凡為
堂若干楹最外為牌門一其碑亭二則又在牌門
之外幾越月而工告成楊君與余同舉進士至是

又同官留都且以余嘗知蕙溪而與聞斯舉也因
屬為文勒諸石余敬次數語而繫以迎神送神之
歌歌曰坎其擊鼓卧龍之陽牲牷蕩滌蕭合馨香
神之來思英風載揚恍惚及交陟降在堂光騰烈
日凜肅嚴霜歌以迎神於豆於觴入歌曰紛再拜
兮廢徹趨踰禮成焚瘞感激衷腸靈之往矣旋駕
洪茫於彼於此無體無方河嶽流峙列宿寒芒歌以送神地久天長

景御史大夫祠在聚寶山祀明景清萬厯間建

周忠節祠在學宮內祀明周是修名德以字行江
西太和人由明經官衡府紀善衡王建文母弟也
留翰林纂修國史燕兵入金川門具衣冠自經於

尊經閣下

黃忠節祠在桃葉渡祀明侍中黃觀妻翁氏及其

二女又一在賽工橋東

附

明焦竑記

侍中黃公死靖難間其夫

人翁與二女及家屬十人併日死金陵今去之二百年所矣乃有公鄉人施益臣者索而封且樹之醢金為祠若干楹并貌公其中會宛陵徐公大任以大光祿來攝京兆徐公廉直好義所在著聲與余善聞之而忻然往拜焉薦蘋藻祠春秋勒為常儀其於表章忠賢之典始備按公諱觀字瀾伯一字尚賓池州貴池人也幼受學元翰林黃暉暉死節於元公感奮以忠義自許洪武二十四年廷對擢進士第一授修撰歷尚寶卿建文初遷禮部右侍郎屬定官制增左右侍中員次尚書改公為侍

中與方齊日見親用文皇索齊黃時公草制極陳
大義辭多指斥未幾公奉詔徵兵入援至安慶聞
金川門變痛哭謂人曰吾妻翁素有志節必不辱
招魂葬之江上是時有司果收翁及二女給配象
奴翁佯以釵釧付奴市酒殺以其間攜二女自沈
於水而家屬十人者隨之公旋至李陽河亦朝服
束向再拜投羅刹磯以死公初以侍中掌尚寶司
事而尹公直去公未遠乃已漫漶莫決又實錄載
翁死於通濟門河翁既給象奴今翁房政在通濟
門外當可信不疑傳聞夫人及二女屍順流而下
至今賽工橋相持而立顏面如生烏鳶類皆不敢
近或為具棺收之待朝命久而不報天順中池人
至京師柳林破棺猶有存者土人指示曰此黃狀
元妻女也乃相與藁裡而掩之余當與益臣輩柩
而問焉三四至其處髣髴低徊為之淒然者久之
野史翁訛為雍又為龔且言淮青橋為其死所後

人弗加檢鏡輒即青溪姑廟以為祠其失遠矣
工橋乃夫人二女埋玉處因祠焉而并以祀公固
當嗟乎人生何常惟義之歸以彼災隆重轅在勢
處顯而一旦身死名滅水消火盡既已坵墟灰燼
荆榛矣即今白楊悲風纍纍道傍者皆是也如夫
人者迄於今為想夫收豎之所稱識仁人義士之
所欽歎歷久而不能忘豈非忠孝之性得於天者
無以異而興於感者不可遏歟余生其地而又幸
及知之不為之發潛揚嫺何以示後公闔門之節
臣死其君婦死其夫女死其父母而賊獲輩死其
主光日月而振宇宙者不待余言乃徵之實錄考
之父老之口其實蹟歷歷可證而至為妄庸者所
瞶亂此余生其地者之責也殆不可以不辨且喜
益臣矢力於下徐公振廢於上見好仁扶義者之
猶有人而於以甄陶世風羽
翼聖化也匪細於是為之記

王陽明祠在西華門大街祀明王守仁

附明焦竑

記孔孟之學至近世而大明如日之中天非無目者未嘗不知而仰之則陽明先生力也先生自謂其學凡數變蓋從萬死一生中得之是可以易言哉今先生之說盛行於世而尸祝之者幾遍宇內獨金陵京師首善之地先生為太僕鴻臚卿於此者且六年都人士沐浴膏澤者不少矣而顧無專祠以祀之非缺事歟頃歲紹興周海門公以符卿攝京兆士大夫樞衣問學者無虛日其所推明闡繹率先生意也爰念居遊無所而瞻嚮靡從乃擇高敞燕閒之處而大葺之經體面勢不大變徙而祠適成當是時京兆黃公繼至尤嘉公意而相其所營於是斷削丹雘之飾煥然以富而士以得學其中為樂相約而詣余請記易曰形而上者謂之道形而下者謂之器余觀先生之始也其

為慮深嘗示人以器而略於道俾守其矩矱而不為深微之所眩然使終於此而已學者將苦其無所從入而道隱矣乃遶一二俊乂時以上焉者問之如所謂無善無惡者是已至今昧者未隱於心而大以為先生病孔子不云乎我則異於是無可無不可不可不可者即善與惡之云也究且舉意必固我而絕之則空洞之中纖微不立而何善惡之可言乎無美者天下之真美也無善者天下之至善也是非都捐泯絕無寄而變化非焉此道之窳條而名曰大本者也不此之求而歛歛然枝葉之辨譬如執糟粕而棄醇醪惡足以與於道哉夫為學而致道猶掘井而及泉泉之弗及即九仞何為也先生起於學絕道廢之餘處困居常矢志必得以彼磨礱鍛鍊如木生嵌巖奇蹇之限欲透復縮而非干霄摩雲則弗止宜乎明既晦而續不傳其所成之偉如此也學者有志於先生之為人不可

不求諸學有志於先生之學不可不求諸道苟其以語上為諱而安於日用不知之民甚非先生之意而亦非符卿所望於諸君子者矣

何廉直祠在富民坊祀明何遵正德時遵為工部主事諫南巡杖死

耿天臺祠在清涼山祀明督學耿定向

倪公祠祀明兵部郎中倪涑上虞人轄船政涑奏定船政載在船政新書衛所感恩立祠於朝天宮
卞將軍廟左

國朝順治乙未衛弁欲變法總督馬國柱奏遵舊制民德之并祀於祠

丁清惠祠在淮青橋東祀明尚書丁賓

羣公惠澤祠在善世橋祀明巡撫方廉等十人隆慶初建

黃侯祠舊在秦淮上祀明府尹黃承元今移三山門外

青溪小姑祠在金陵肺祀漢蔣子文妹

張莊節祠在雨花臺祀明季死難左都督張可大
汪文毅祠在冶城西祀明死節檢討汪偉偉與妻
耿氏同日殉甲申之難

國朝順治八年

賜謚建祠

李文定祠在句容縣崇福寺內祀明大學士李春
芳句容舊無城郭嘉靖間數被倭寇春芳倡舉築
城邑人永賴

劉公祠在溧水縣北三十五里祀唐劉太真

表忠祠在溧水縣治祀明尚書齊泰嘉靖中建

慕賢祠在江浦縣東北白馬寺左祀宋陸九淵明

陳獻章王守仁

定山祠在江浦縣南祀明莊景嘉靖間建

忠賢祠在六合縣治北祀唐康大尹宋名將韓世

忠岳飛明邑令歐陽得基都督楊能參議黃宏後

增元處士郭淵明按察使王弘知縣唐詔邑人張

約

于清端祠在南門外長千里祀

國朝總督于成龍

三國吳大帝蔣陵在上元縣鍾山之陽孫陵岡上步

皇后合葬於此宣太子登亦祔葬

晉元帝建平陵 明帝武平陵 成帝興平陵皆在

上元縣雞籠山

康帝崇平陵在上元縣鍾山

穆帝永平陵在上元縣幕府山

哀帝安平陵在上元縣雞籠山

簡文帝高平陵

孝武帝隆平陵

安帝休平陵

恭帝沖平陵竝在上元縣鍾山西南

南北朝宋武帝初寧陵在上元縣鍾山東南

文帝長寧陵在上元縣鍾山東南相近初寧陵袁

皇后祔

明帝高寧陵在上元縣幕府山陽

少帝陵在江寧縣南郊壇

孝武帝景寧陵在江寧縣巖山文穆皇后祔

孝武路太后修寧陵在江寧縣巖山孝武陵東南

前廢帝陵在江寧縣南郊壇西

齊明宣沈太后陵在上元縣幕府山俗稱國婆嶺

文惠太子陵在上元縣查硯山夾石

明欽劉皇后陵在上元縣淳化鎮北

梁昭明太子安寧陵在上元縣夾石與齊文惠太子

陵相竝

文宣阮太后陵在江寧縣通望山

孝元帝陵在江寧按陳天嘉元年詔梁孝元遭罹
多難靈輓播越朕曾經北而有異常倫遣使迎接
已次近路江寧既是舊塋宜即安卜車旗禮章悉
用梁典依魏葬漢獻帝故事

陳高祖萬安陵在上元縣城東三十五里崇里鄉石獸二尚存俗名石馬沖

文帝永慶陵在上元縣雁門山北

明太祖孝陵在上元縣鍾山之陽與高皇后合葬懿文太子祔焉

國朝定鼎後置守陵太監二名兵四十名

聖祖仁皇帝南巡詣陵親祭並書治隆唐宋四字勒碑

聖祖御製過明太祖陵有感詩

恭紀首卷

周越王塚在句容縣大橫山下王名翳周安王時薨
左伯桃羊角哀墓在溧水縣南四十五里儀鳳鄉
孔鎮南大驛路西二人俱戰國時燕人同入楚糧
少伯桃并糧與哀入空樹中餓死哀至楚為上大
夫言於王備禮葬之後伯桃見夢於哀哀開塚從
伯桃死遂竝葬焉

按戰國時楚自郢遷陳又自陳遷壽春二人自燕
往楚不應渡江而南此處有墓誤也因舊志相仍

姑存而辨之

附

明徐良彥古義士左伯桃羊角哀

墓贊

羊角哀左伯桃為死友聞楚王賢往見之道遇雨雪計不俱全乃併衣糧與角哀入樹中

死贊曰生則兩死死則一生含笑入樹何友非身樹既摧殘墓亦滅沒先生之神獨耀今昔仰止高

風媿此隙末予立貞珉匪擇撫收

楚項羽墓在江浦縣烏江

按漢高祖以魯公禮葬

羽於穀城事見史記此不當有墓因舊志相傳姑存之

漢司徒甄邯墓在玄武湖側劉宋張永開湖遇古塚

得一銅斗有柄文帝以訪何承天曰此亡新威斗
三公亡者皆賜之一在塚內一在塚外後啟塚更
得一斗有石銘云大司徒甄邯之墓

三國吳折衝將軍甘寧墓在上元縣直瀆山下

丞相張悌墓在江寧縣板橋西

仙翁葛元墓在句容縣西南一里

晉荊州都督山簡墓在上元縣覆舟山之陰樂遊苑

內

驃騎將軍溫嶠墓初葬豫章朝廷追思之為造大墓還葬上元縣幕府山陽

尚書令卞壺墓在上元縣朝天宮西二子眇盱眊葬義熙間盜伐其墓壺鬚鬚蒼白面如生手拳爪達於手背安帝賜錢修之

丞相王導墓在上元縣幕府山西對石灰山

祭酒顏含墓在上元縣靖安里曾孫延之銘十四代孫真卿重書立石

寧朔將軍竺瑤墓在張陣湖有二碑

司空陸玩墓在上元縣雞籠山給兵千人置守塚
七十家子尚書令納亦葬此山一云葬吳縣雞籠
山

丹陽尹劉惔墓在江寧縣七世孫顯仕梁為平西
府諮議參軍亦祔焉

丞相謝安墓在江寧縣南梅岡

長史王濛墓在江寧縣高亭湖側

洗馬衛玠墓在江寧縣新亭東

句漏令葛洪墓在句容縣

驃騎將軍紀瞻墓在句容縣東南二十五里

南北朝宋臨川郡守謝靈運墓在上元縣本業寺南
唐保大中孫憲嘗建碑

冥漠君墓彭城王義康修東府城得古塚改葬東
岡命謝惠連為文祭之不知其名遂立此號

法曹參軍謝惠連墓在上元縣宣義鄉與本業寺

相近

雍州刺史宗慤墓在石泉里

尚書僕射劉穆之墓在江寧縣元嘉二十五年車
駕經穆之墓詔致祭

徐州刺史吉翰墓在江寧縣吉山

齊海陵王昭文墓沈括筆談云慶厯中金陵人得方
石視之乃知齊海陵王墓謝朓撰誌銘並書

居士明僧紹墓在府東北攝山

尚書令柳世隆墓在上元縣倪塘世隆曉術數於
倪塘創墓每往常坐一處及卒墓工圖墓正取其
坐處焉

彭城郡丞劉瓛墓在上元縣青龍山

豫章王嶷墓 竟陵王子良墓竝在江寧縣金牛

山

梁吳平侯景墓在上元縣花林寺

始興王憺墓在縣黃城村 臨川王宏墓在縣北

城鄉安成王秀墓在上元縣甘家巷

建安侯正立墓在上元縣淳化鎮西

司徒王僧辯墓在上元縣方山東南僧辯為陳高祖所害父子七人同瘞一穴宣帝天嘉中故吏衛卿許亨請以家財造墓葬之

豫州刺史裴邃墓在上元縣光宅寺西梁大同初早蝗松柏盡彫邃墓如舊當時異之

南康王績墓在句容縣西北二十五里

諸王侍讀陶弘景墓在句容縣東南雷平山

陳貴妃張麗華墓在府城西南賞心亭側

尚書僕射周弘正墓在句容縣東三十五里

唐顏尚書墓在句容縣後顏村舊謂真卿墓非也考

魯公上世多葬金陵延之子竣等皆歷尚書

侍郎劉太真墓在漂水縣北三十五里

雙女墳在漂水縣南舊招賢館側唐漂水尉崔致

遠憩招賢館中為詩弔此墳因感夢知二女乃宣

城張氏天寶六年同葬此

貞晦先生陳融墓在六合縣堂邑鄉

南唐平章事張居詠墓在江寧縣金陵鄉

中書侍郎韓熙載墓在江寧縣梅岡

散騎常侍徐鉉墓在句容縣政仁鄉

慶王弘茂墓在高淳縣南十里弘茂元宗第二子也

宋員外郎王益墓在上元縣鍾山益安石之父曾鞏

有墓銘

司空王安石墓在上元縣鍾山半山寺後弟祕閣
校理安國右丞安禮墓竝在江寧

太子賓客謝濤墓在上元縣土山

侍郎葉祖洽墓在上元縣雁門山

都統制王德墓在觀音門外傅雱撰碑

待制張孝祥墓在上元縣城東北清果寺側孝祥

僑寓建康卒葬於此

節度使王瑋墓在上元縣棠梨山

團練使盛新墓在上元縣武岡山

節度使王鑑墓在上元縣竺山

贈節度使李邕墓在上元縣青龍山邕臨江人知
真定府金兵破城不屈而死

通判楊邦乂墓在江寧縣聚寶門外紹興中游九
言撰碑

防禦使張保墓在江寧縣松林莊

待制李琮墓在江寧縣板橋西龍口山

通判秦鉅墓在江寧縣移忠寺側子浚潭竝祔

先儒尹起莘墓在江寧縣印塘村

叅政魏良臣墓在溧水縣西南九十里

尚書俞棣墓在溧水縣西琛山十五里

明中山王徐達墓在上元縣鍾山之陰

開平王常遇春墓 岐陽王李文忠墓 東甌王

湯和墓竝在上元縣鍾山

蘄國公康茂才墓在上元縣幕府山

東丘郡侯花雲墓在上元縣南五十里水橋洪武
七年以衣冠與夫人郗氏合葬宋濂為墓碑

江國公吳良墓 海國公吳貞墓並在上元縣鍾
山

滕國公顧時墓 安陸侯吳復墓並在上元縣鍾
山

許國公王志墓 芮國公楊璟墓並在上元縣鍾

山

汝南侯梅思祖墓竝在上元縣鍾山

靜誠先生陳遇墓在上元縣鍾山

太常寺卿呂本墓在上元縣鍾山

都御史丁璿墓在上元縣崇禮鄉

尚書王敞墓在上元縣土山

都御史金澤墓在上元縣鍾山岡

尚書梁材墓在上元縣白山

尚書顧璘墓在上元縣彭城山

侍郎李喬墓在上元縣黃練岡

都督張可大墓在上元縣侯家塘

太僕卿方大美墓在上元縣邵村

監丞黃居中墓在上元縣官山

張賢妃墓在江寧縣牛首山東高帝妃荆憲王之

母諡恭靖順妃

李順妃墓在江寧縣吉山東北亦高帝妃

韓憲王松墓在江寧縣安德鄉高帝第二十子俗呼韓府山

駙馬梅殷墓在江寧縣牛首山殷汝南侯思祖從子尚寧國公主恭謹有謀能騎射為總兵官鎮守淮南靖難兵起殷悉心防禦使人招之割其耳鼻令之報命及成祖即位召至京永樂三年為都督譚深指揮趙曦所誣害殷自投水死有麾下口外人瓦剌輝發其事成祖特命斬二人輝即自經死

葬殷墓側

駙馬李祺墓在江寧縣祝釐寺西南尚臨安公主
永樂初不朝賜死江浦後合葬於此

駙馬胡觀墓在江寧縣牛首山下尚南康公主靖
難兵起距戰死

駙馬張麟墓在江寧縣七里鋪東尚福清公主

駙馬尹清墓在江寧縣雨花臺南尚含山公主

駙馬謝達墓在江寧縣安德鄉尚汝陽公主

駙馬沐昕墓在江寧縣泰北鄉尚常寧公主

寧河王鄧愈墓在江寧縣西山之原

黔寧王沐英墓在江寧縣長泰北鄉

虢國公俞通海墓在江寧縣聚寶山

越國公胡大海墓在江寧縣城南十五里

梁國公趙德勝墓在江寧縣烏石岡

郢國公馮國用墓在江寧縣鳳西鄉

陝國公郭子興墓在江寧縣聚寶山

營國公郭英墓在江寧縣聚寶山

沂國公金朝興墓在江寧縣太平門外

當塗縣男王愷墓在江寧縣雨花臺側

夏國公顧成墓在江寧縣安德門外普化寺北

蔡國公徐忠墓在江寧縣城南十五里

鄆國公宋晟墓在江寧縣聚寶門外

平江侯陳瑄墓在江寧縣大山之原

安遠侯柳升墓在江寧縣安德鄉

隆平侯張信墓在江寧縣朱門山

忻城伯趙彝墓在江寧縣鳳臺門東

瑞安侯王源墓在江寧縣聚寶門外鳳臺街

豐城侯李彬墓在江寧縣吉山東南

尚書唐鐸墓在江寧縣南十五里鐸鳳陽人賜葬
於此

總制孫炎墓在江寧縣聚寶山

太常卿杜安道墓在江寧縣安德街東

贈高陽郡侯韓成墓在江寧縣吉山

文學博士方孝孺墓在江寧縣聚寶山側孝孺磔
死都督廖鏞拾遺骸葬之見鄭曉吾學編或云其
門人王徐輩收葬或云土人竊葬萬厯十九年禮
部主事汪應蛟湯顯祖為文立石表其墓尚書王
弘誨趙用賢暨坊祠祀之三十二年處士徐鯨復
捐資修墓

淳泥國王墓在江寧縣石子岡永樂中來朝卒賜

葬於此

太常卿康爵墓在江寧縣新亭南

學士張益墓在江寧縣鳳西鄉西庫村

尚書周瑄墓在江寧縣安德鄉

太醫院使蔣用文墓在江寧縣鳳西鄉塘下山

尚書童軒墓在江寧縣鳳臺岡

尚書倪謙墓在江寧縣新亭鄉

尚書倪岳墓在江寧縣新亭鄉堽墓村

尚書唐瑄墓在江寧縣唐家山

都御史張琮墓在江寧縣鳳西鄉

尚書王以旂墓在江寧縣白山

侍郎俞綱墓在江寧縣聚寶門外禾山南

尚書翟瑄墓在江寧縣新亭鄉

尚書吳文度墓在江寧縣石子岡

都御史陳鎬墓在江寧縣鳳西鄉

太僕卿陳沂墓在江寧縣安德門外岔山口

副使顧瑋墓 郎中王鑾墓並在江寧縣石子岡
太僕少卿王韋墓在江寧縣吉山

給事中魯昂墓在江寧縣耿澗村

僉事徐完墓在江寧縣小留山

布政吳彥華墓在江寧縣新亭鄉

孝子龍景華墓在江寧縣鳳西鄉

御史沈越墓在江寧縣石子岡

侍郎吳自新墓在江寧縣銅山鄉

副使顧國輔墓在江寧縣女山

太常卿許穀墓在江寧縣安德門外

修撰焦竑墓在江寧縣皮家庫

侍郎顧起元墓在江寧縣雲臺山

侍郎朱之蕃墓在江寧縣牛首山前

大學士程國祥墓在江寧縣安德門外北山

檢討汪偉墓在江寧縣射烏山妻耿氏祔

督學僉事王芝瑞墓在江寧縣仙鶴觀側

侍郎殷邁墓在江寧縣湖堰村

諸生楊希淳墓在江寧縣牛首山

尚書曹莪墓在句容縣箭塘山

知府李茂功墓在句容縣西門外大墅村

尚書李思誠墓在句容縣張王廟東

太僕寺卿張諫墓在句容縣福胙鄉

尚書齊泰墓在溧水縣青絲洞

郎中莊景墓在江浦縣定山

昌平伯楊洪墓在六合縣竹鎮

太常少卿黃宏墓在六合縣靈巖山

大學士熊賜履墓在江寧縣聚寶門外賜履孝感人

尚書王弘祚墓在句容縣茅山弘祚雲南人

侍郎李敬墓在六合縣龍山

副使徐必遠墓在江寧縣建業鄉

江南通志卷三十七